



Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

24 Juin 2016 ~
(18 Ramadan 1437 AH)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al-Fatiha, et li fine ensuite cause lor le sujet « La Nuit du Destin »:

LA NUIT DU DESTIN

بِسْمِ اللَّهِ الرَّحْمَنِ الرَّحِيمِ ○ إِنَّا أَنْزَلْنَاهُ فِي لَيْلَةِ الْقَدْرِ ○ وَمَا أَدْرَاكَ مَا لَيْلَةُ الْقَدْرِ ○ لَيْلَةُ الْقَدْرِ خَيْرٌ مِنْ أَلْفِ شَهْرٍ ○ تَنْزِيلُ
الْمَلَائِكَةِ وَالرُّوحِ فِيهَا بِإِذْنِ رَبِّهِمْ مِنْ كُلِّ أَمْرٍ ○ سَلَامٌ هِيَ حَتَّى مَطْلَعِ الْفَجْرِ ○

Bismillaahir-Rahmaanir-Rahiim; 'Innaaa 'anzalnaahu fii lay-latil-Qadr: Wa maaa 'adraakamaa Lailatul-Qadr? Lailatul - Qadri khayrum-min 'alfi shahr. Tanazzalul-malaaa 'ikatu war-Ruuhu fiihaa bi-'izni-Rabbihim-min kulli 'amr: Salaamun Hiya hattaa matla-'il-Fajr.

Si la Nuit du Destin (*Laila-tul-Qadr*) ki trouve dans dernier 10 zour de mois Ramadhan li distingue li de bane les autres la nuits de sa même mois béni là ou même de bane les autres la nuits de l'année, c'est en raison de so supériorité, et ena même ene Chapitre en entier du Quran ki consacré entièrement lor le sujet, c'est-à-dire, le Chapitre 97 Al-Qadr, Versets 1-6 :

« Au nom d'Allah, le Très Gracieux, le Très Miséricordieux. Vraiment, Nous fine fer li (le Quran) dessane pendant la Nuit du Destin. Et ki pou faire toi conner ki été sa la Nuit du Destin ? La Nuit du Destin li meilleure ki mille mois. Bane anges et l'Esprit dessane pendant sa la nuit là, par permission zot Maître, avec sak l'ordre. C'est la paix, ziska ki soleil levé. » (Al-Qadr 97: 1-6).

Bane traditions rapporté ki le Saint Prophète Muhammad ^(saws) ti en route pour vine informe bane musulmans de date de la Nuit du Destin, kan à cause d'ene dispute entre deux dimounes la connaissance concernant sa zaffaire là fine enlevé de li. Hazrat Muhammad ^(saws) fine exprime sa l'opinion là ki sa ti en effet ene bien pour bane musulmans (kan li fine arriver oublier sa date là).

Hazrat Aisha (*Radhi' Allah Anha*), l'épouse du Messenger d'Allah ^(saws) fine informe nous: « *Rassoollullah* ^(saws) *ti ena l'habitude pou alle en retraite dans Masjid pendant dix derniers jours du mois de Ramadhan, dans bane la nuits impairs de dix derniers la nuit du mois de Ramadhan.* » (Boukhari & Mouslim).

Donc, bane la nutes possibles c'est : 21^{ème}, 23^{ème}, 25^{ème}, 27^{ème} & 29^{ème}.

Néanmoins, ena plusieurs l'opinions ki fine prononcé lor la question avec bane divergences. Imaam Maalik (*Rahimullah Alayh* - Ki Allah répanne So Pitié lor li) li de l'opinion ki tous bane la nuits de dernier dix jours zot bane candidats égale, et aucaine d'entre zot pas pli probable ki bane les autres. D'après Imaam Shaafi (*Rahimullah Alayh*) date ki pli probable c'est 21^{ème} la nuit. D'après Bilal (*Radhi' Allah Anho* – Ki Allah content avec li), Rassoollullah ^(saws) fine déza dire ene fois ki c'est 24^{ème} la nuite. D'après Abu Dharr (*Radhi' Allah Anho*), c'est 25^{ème} la nuite. Quant à Ibn Abbas et Ubayy Ibn Ka'ab (*Radhi' Allah Anhum* – Ki Allah content avec zot), zot fine dire ki c'est 27^{ème} la nuite. Imam Ahmad Ibn Hanbal (*Rahimullah Alayh*) aussi de même l'opinion ki zot. En fait ene cinquantaine l'opinions capave recensé à propos manifestation de sa la nuit béni là.

Pour ene musulman pas ena meilleure façon pou obéir à l'ordre du Messenger d'Allah ^(saws) concernant cherche la Nuit du Destin sauf pou faire pareil couma li ti pé faire. Le Saint Prophète ^(saws) fine dire: « *Quiconque passe la Nuit du Destin en adorant Allah, avec ene la foi sincère en Allah et ene conviction ferme dans la récompense divine, Allah pou pardonne so bane péchés passé.* » (Bukhari & Muslim).

Hazrat Aisha (*Radhi' Allah Anha*) fine rapporté : « *Quand dix dernier jours du mois de Ramadhan ti pé vini, le Messenger d'Allah* ^(saws) *ti ena l'habitude serre so ceinture, et reste éveiller la nuit et pou réveille so la famille.* » (Bukhari & Muslim).

Hazrat Muhammad ^(saws) ti ena l'habitude redoubler so bane zéffore dans *Ibaadat* dans derniers dix jours de Ramadhan plisse ki dans bane les autres jours de Roza (de Ramadhan). (Muslim).

Hazrat Aisha (*Radhi' Allah Anha*) ti déza pose sa question suivant là au Saint Prophète Muhammad ^(saws). Li fine demande li: « *Ô Messenger d'Allah! Ki mo bizin dire comme duah si mo arriver zoine la Nuit du Destin ?* » Li ^(saws) fine réponne: « *Dire : Ô Allah ! To Celui ki efface bane péchés, To content efface bane péchés, efface donc mo bane péchés.* » (Tirmidhi).

Le Saint Prophète Muhammad ^(saws) ti exprime l'opinion à propos le fait ki bane musulmans pas conne date exacte de *Laila-tul-Qadr* ti en fait ene bien pour zot. La question ki poser astaire, c'est kifaire Allah pas fine informe So bane serviteurs de sa ?

Sheikh Abdul Qadir Jilani (*Rahimullah Alayh*) fine réponne à sa question là dans sa façon là: « *Allah (swt) oulé assure Li ki So bane serviteurs pas ena bane fausses l'idées concernant bane bons actions*

pieux ki zot fer pendant sa la nuit spécifique là. Si pas ti ena sa incertitude (concernant date de Laila-tul-Qadr là), alor zot ti pou capave mette en avant sa argument là : ‘Nous fine (réussi) fer bane actions pieux pendant ene la nuit ki vaut mieux ki mille mois. En plisse de sa, Allah (swt) fine pardonne nous et dans So lizié nous mérite de ce fait ki nous être élevé spirituellement et ki nous gagne accès dans Paradis.’

Zot ti capave par la suite délaisse tout bane zéffore pou fer bane bons actions et alor zot pou repose zot lor zot lauriers (sans aucaine traca), et zot pou zourir d’ene repos mérité après zot succès (c’est-à-dire, kot zot fine réussi conne et trouve Laila-tul-Qadr). (De ce fait) Étant victimes de zot optimisme ki mal justifié, zot ti pou alor condamné à l’égarement. »

L’heure de la mort aussi li ene secret ki Allah pas divulguer. Parski si Li ti fer sa, alor ene dimoune ti pou capave donne libre cours à tous so bane désirs charnelles, li ti pou zourir de tous bane plaisirs illicites (*Haram*) ki le monde capave offert li, et kan li près pou approche de so la mort, alor li commence repentir, et li tellement dévouer li entièrement à l’adoration d’Allah et li penser de sa façon là ki li pou capave alor mort dans ene l’état de repentance et comme ene croyant pratiquant.

À vrai dire, sa bane secrets là zot forme ene motivation ki agir en permanence pour pousse ene serviteur d’Allah pou pratique la piété, pou repentir continuellement et pou fer bane zéffore sans relâche afin pour améliorer so conduite. D’après ene l’auteur anonyme, Allah (swt) fine cachiette cinq kitchoses dans cinq les autres. Li fine cachiette:

- 1) Le plaisir d’Allah dans bane actes d’obéissances;
- 2) So colère dans bane actes de désobéissances;
- 3) La prière du milieu parmi les autres la prières obligatoires (5 fois Namaz).
- 4) So Camarade, le Saint (*Wali*) parmi So bane créatures; et
- 5) La Nuit du Destin dans le mois de Ramadhan.

Au vu de saki mo fine fek mentionner, c’est ene erreur pou fixer la Nuit du Destin en ene sel la nuit spécifique. Nous bizin rappel ki le Messenger d’Allah ^(saws) ti invite so bane compagnons pou cherche la Nuit du Destin (*Laila-tul-Qadr*) pendant bane dix derniers jours du mois de Ramadan, et li-même li fine donne l’exemple pratique et concret de sa recherche là kan li fine alle en retraite complet dans Masjid pendant dix dernier la nuits du mois de Ramadhan. Eski Allah (swt) pas fine dire dans Quran Shareef:

« Zot ena en vérité dans le Messenger d’Allah ene excellent modèle (à suivre) pour quiconque ki espère dans Allah et dans le Jour Dernier et ki invoque Allah beaucoup. » (Al-Ahzab 33: 23) ?

Mo souhaite à zot tous, mo bane frères et sœurs, mo bane disciples dévoués sa *duah* là, ki Allah accorde zot bane richesses de la bénédiction complète de la Nuit Sacrée du Destin. Par la grâce d’Allah, Allah fine accorde zot ene la vie entier de *Laila-tul-Qadr*, parski Li fine envoie moi vers zot avec le Saint Esprit (*Ruh-il-Qoudouss*) pour faire revivre zot l’âme, pour montrer zot le chemin qui amène vers Allah et So satisfaction. Ki Allah faire zot reste toujours lor sa chemin droite là, sa même chemin vers quoi Li fine dirige zot, et ki Allah aide bane les autres dimounes par milliers pou aussi trouve et marche lor sa chemin ki donne et sauve la vie là. *Insha-Allah, Ameen.*

DIFÉ DANS MASJID BAITUL FUTUH

En début de sa semaine là, à travers Youtube dans Rabwah Times ki fine posté le 08 Juin 2016, mo fine apprane couma Masjid Baitul Futuh de l'Association Ahmadiyya dans Morden, dans Londres fine prend difé le 26 Septembre 2015. Dans l'Angleterre, sa même pli grand Masjid ki exister. Li ti complété en 2003 dans ene valeur approximatif de 15 millions livres sterlin, et Masjid là couvert 5.2 Acre terrain (environ 226,520 pieds carré).

Sa grand Masjid là fine prend difé le 26 Septembre 2015, surtout dans so bane parties administratif. En tout, à peu près 50% de Rez-de-Chaussé, aussi bien ki bane parties de premier l'étage et toit là-haut fine prend difé.

Li malheureux (bien bien triste) saki fine passer, mais ena là-dans ene grand signe surtout kan depuis lontan mo fine demande l'Administration de l'Association Ahmadiyya et même le présent Calife ki zot fer moi gagne mo la sueur, mo salaire (et temps service en tant ki ene employé du Jamaat). Zot fine fer sourde d'oreille et pas fine donné. Alors mo pas trouve sa ene coïncidence ki de côté l'Administratif le plus fine prend difé. Et bizin rappelle aussi ki c'est pour construction sa même Masjid là ki ti ena fraude. Bane Ahmadis (Maurice) ti pé dire (haut et fort) ki « *Khalifa conne tous saki passer l'autre côté dilo* », et c'est après sa ki fine arrive sa fraude là devant néné du Calife à sa l'époque là, kot saki ti pé passer dans so la caze même li pas ti conner. Kan li fine alle conner, pas fine ena boycotte, mais pluto fine prend bane coupables là et retire zot depuis zot poste et pas fine ena enhors du Jamaat (expulsion) pou zot. Sa zot touffé. Et pour nous, ki faire fine mette nous dehors ? A cause Révélation !

Et penser bien ki c'est dans l'année centenaire Jamaat Ahmadiyya Maurice ki sa fine passer, kot ene chef spirituel refuse pou vine célébrer sa centenaire là et kot après li dire bane membres Jamaat Maurice '*Alle redresse zot Jamaat*' et li, li prend so chemin li alle Japon, sans tracas, parski li conner, ene coup *Élaan* li faire, abé Kass pou rentre dans la caisse ! Comme ene chef ki li ti bizin faire ? Li ti bizin vini pou nettoyer et mette propre. Si la tête pas bon, brosse la tête là et mette l'ordre dans Jamaat là !

Mo espérer zot prend sa compte, saki mo pé dire, et en même temps mo pé cause pou tout bane travailleurs du Jamaat (Ahmadiyya). Conne traite bane travailleurs du Jamaat couma bizin et donne zot, zot due ki bizin ; non plus bane travailleurs du Jamaat pas traité couma bizin, ou trouve l'argent pé dépenser lor bane les autres ki pas pé fer aucaine travail du Jamaat, ki nek pé vini, assizer, manger et boire. Ena ene Langar Khana couma l'Hotel 5 Étoiles, ki rouler 24 lor 24 et kot ene sel kalité nationalité pé profite sa ! Ene Messenger d'Allah pas capave trouve bane z'affaires injustice coumsa.

Donc, ki Allah aide sakaine parmi nous dans sa mois de Ramadhan là, et nous profite bocou, nous fer bocou de duahs et ki Allah béni sakaine parmi nous, et même bane frères et sœurs ki pé préparer pou alle reste *Ittikaaf*, ki Allah accepter sa de zot et montrer zot bane grands signes. *Insha-Allah, Ameen.*